



Inatsisartuni ilaasortaq Aleqa Hammond

§ 36 naapertorlugu apeqqummut nr. 2010-180-imut akissut, ALHA Kalaallit Nunaata Kujataanut angalaneq

Inatsisartut suleriaasianni § 36, imm. 1 naapertorlugu Inatsisartuni ilaasortaq Aleqa Hammond (Siumut), Kalaallit Nunaata Kujataani juunip qaammataani angalanermit tunngatillugu Naalakkersuisunut matuma kinguliani allassimasutut apeqquteqarpoq:

11. oktober 2010

Postboks 1601

3900 Nuuk

Tlf. (+299) 34 50 00

Fax (+299) 32 56 00

E-mail: lsiln@nanoq.gl

www.nanoq.gl

Naalakkersuisunut apeqqut:

"Inuussutissarsiornermut Aatsitassarsiornermullu Naalakkersuisup oqaatigisinnaavaa nammineq Naalakkersuisullu Siulittaasuata suut aatsitassarsiorfiit Kujataani junimi takusarsimanerlugit aammalu suut tunngavigalugit toqqarneqarsimanersut aningaasalersorneqarsimanersullu?"

(Inatsisartuni ilaasortaq Aleqa Hammond, Siumut)

Tunngavilersuut:

Paasissutissat pineqarsinnaasut malillugit taakku Naalakkersuisunut marluk toqqarsimavaat suliffeqarfiit nuliamik piginneqataaffigisaasa GreenGem ApS-ip siulersuisoqarnerisigut aammalu siunnersuisoqarnerisigut suleqataasa pulaarnissaat allanit siulliullugit. Pissutaasoq nassuiaqquneqarpoq.

Akissuteqaat:

Naalakkersuisut Siulittaasuata aamma Inuussutissarsiornermut Aatsitassanullu Naalakkersuisoq piffissami 16. – 19. juni 2010-mi, pisortani oqartussaasut, sullissiviit aammalu suliffeqarfiit ataatsimeeqatiginissaat siunertaralugu Kalaallit Nunaata Kujataani angalapput.

Angalanermi sullissiviit makkua ataatsimeeqatigineqarput: SIP, Kommune Kujallermi kommunalbestyrelsimi ilaasortat, najukkami inuussutissarsitutunik ingerlatallit, misissuinermit ingerlatseqatigiiffik Rimbald Pty. Ltd. Killavaat Alannguanni misissuinermit ingerlataqartoq, Inuili, NEQI A/S kiisalu Kalaallit Nunaata Kujataani savaateqarfinnut tikeraarnerit.

Sulinermit atatillugu angalanerit aningaasanut inatsimmi pisortat aningaasaliissutaasigut aningaasalersorneqartut tassani pineqarput.

Misissuinermit suliqaarfinnut nakkutillilluni takusaanermut tunngatillugu, misissuinissamut akuersissutinut atugassarititaasunut nalinginnaasunut naapertuuttumik nalinginnaasumik suleriaasiuvoq, ingerlatseqatigiiffiit misissuinermit ingerlataqartut sumiiffinnut misissuiffigineqartunut tassangaaniillu utimut angallanneqarneq isumagisussaagaat. Taamatut aamma pisoqarpoq Inuussutissarsiornermut Aatsitassanullu Naalakkersuisoq Ove Karl Berthelsen ukioq kingulleq Greenland Minerals and Energy A/S-ip Kuannersuit eqqaanni misissuinissamut akuersissutaateqarfianut tikeraarmat.

"KALAALLIT NUNAANNI ATORTUSSIASAT AATSITASSANIT PISUT (IKUMMATISSIASAT PINNAGIT) PILLUGIT MISISSUINISSAMUT AKUERSISSUTINUT ATUGAS-SARITITAASUSSAT"-ini aalajangersagaq attuumassuteqartoq, misissuinissamut akuersissutinut tamaginnut atuuttoq imatut allassimavoq:

804. Pisinnaatissisummik pigisaqartup, sumiiffiup takusarneqartup aamma Kalaallit Nunaanni tamanut timmisartoqarfiup qaninnerpaap imaluunniit qulimiguulinnut mittarfiup akornanni timmisartumik ilaasartaammik nakkutilliusup angallanneqarneranut aningaasartuutit naleqquttut akilissavai aammalu isumaqatigiissuteqarnikkut tamanna aaqqissuutissallugu. Taamatuttaaq tamanna nakkutilliusup sumiiffimmi takusaaffiusumiinneranut immaqalu aamma sumiiffimmi akuersissummi pineqartunut ilaasumi angallanneqarneranut atuuppoq. Aningaasartuutit taamaattut immikkoortoq 601-602-ip naammassineqarnissaanut misissuineranut aningaasartuutitut ilanngunneqassapput.

Kalaallit Nunaata Kujataanut angalanermi tassani siunertaavoq tamaani nunap ilaani inuussutissarsiornermut periarfissanik pitsanngorsaansamik periarfissat pillugit sumiiffimmi soqutigisaqartunik oqaloqateqarnissaq, Rimbal Pty. Ltd.-imit aallartitanik ataatsimeeqateqarneq pingaaruteqarpoq, tassa misissuineramik suliqaarneq ima ingerlareersimatigimmat, allaat akilersinnaassutsimik misissuinerup 2011-imi inaarsarneqarnissaa naatsorsuutigineqartoq ingerlatseqatigiiffiup nittarsaassimallugu. Imminut akilersinnaassutsimik misissuineq neriulluarnartumik inerneqarpat, tamatuma kinguninngua pilaanisamut akuersissummik qinnuteqaat tunniunneqassasoq naatsorsuutigineqarsinnaavoq.

Sumiiffimmi misissuineramik suliqaarnernut allanut tunngatillugu, Inuussutissarsiornermut Aatsitassanullu Naalakkersuisoq Ove Karl Berthelsen 2009-imi Greenland Minerals and Energy Ltd.-ip Kuannersuarni suliqaarfianut tikeraareerpoq, aammalu tamanna iluatsillugu ingerlatseqatigiiffik suliassaq pillugu oqaloqatigisinnaasimallugu. Naalakkersuisut Siulittaasuata Kuupik Kleist-ip aamma Inuussutissarsiornermut Aatsitassanullu Naalakkersuisup Ove Karl Berthelsen-ip tamatuma saniatigut Greenland Minerals and Energy Ltd.-imit aallartitat aamma ataatsimeeqatigivaat.

Naggasiullugu apeqqummut tunngavilersuutitut "Paasissutissat pineqarsinnaasut maililugit taakku Naalakkersuisunut marluk toqqarsimavaat suliffeqarfiit nuliamik piginneqataaffigisaasa GreenGem ApS-ip siulersuisoqarnerisigut aammalu siunnersuisoqarnerisigut suleqataasa pulaarnissaat allanit siulliullugit. Pissutaasoq nassuiaqquneqarpoq." oqaasertaliussat pillugit Aningaasaqarnermut Naalakkersuisup § 36 naapertorlugu apeqquaanut nr. 2010-178-imut innersuussissaanga.

Ikinngutinnersumik inuulluaqqusillunga
Inuussutissarsiornermut Aatsitassanullu Naalakkersuisoq



Ove Karl Berthelsen